

办理之法也。是夕，唐景星得电报丁内忧，公私事件就景星商办者甚多，而偏有此遭际，所事竟悬而无薄。无往而不见其运之蹇也。

初八日。礼拜。李勉林、刘芝田、姚吟甫^{金眉生妹婿}、李薇生^{妻侄}、刘立夫^{刘霞仙堂弟}来见。勉林早至，因留饭。语及刘云生为人，使人郁怒不可回。随往拜刘芝田、李勉林、叶顾之、张叔和、王心如、蔡二源、徐雪村，兼诣周瀛士、姚彦嘉、黄泳清、张听帆谢寿，又为莫善徵、唐景星致唁。于景星处见唐道绅，为景星从弟；于勉林处见曾文典，为劼刚从弟，在机器局管支应。与勉林、芝田粗论西学馆事宜，当稍议章程，由合肥爵相酌定。居今日而思统筹全局，以求利益国家，其势诚有难行，为衮衮诸公深闭固拒，以力遂其苟偷旦夕之私，虽有圣者，无如何也。要当各视其愿力为之；愿力所及，能尽一分，必少收一分之益。人人积此心以相饷，其利亦溥矣。此区区之私，所以徘徊顾念而必求一行所见也。西洋政教、制造，无一不出于学。中国收召虚浮不根之子弟，习为诗文无实之言，高者顽犷，下者倾邪，悉取天下之人才败坏灭裂之，而学校遂至不堪闻问。稍使知有实学，以挽回一世之人心，允为当今之急务矣。

初九日。往拜英领事达文波、副领事阿林格、刑司弗林史、副刑司默挖特、翻译斯格达、禧在明；法领事李梅、翻译阿麟；美领事贝礼、翻译马高温；德领事吕德、副领事恪伦泗吉、翻译穆麟德；奥领事卜理挖楷；俄领事聂鼎；日本领事品川忠道、翻译吴硕；意公使兼领事德路嘉、翻译邓文道；税务司赫政、副税司许妥马、翻译劳德、造册司柏卓安。其专送名帖者：丹领事庄纯；荷领事许思格；葡萄牙领事席尔发；比利时领事莫尔；日斯巴尼亚领事嘉拉意、翻译俄利喊喇；瑞典、啰喊领事弗弼斯、副领